

興縣志卷之十四

人物

語曰人才不擇地而生夫窮鄉僻壤秉天地之正氣竒節偉行何地蔑有況興邑風氣剛直其民敦樸少文士以節義自見者甚多而貞婦烈女率凜松筠冰雪之操徃徃動人志氣願以文獻不足紀載多闕焉今涵濡於重熙累洽之化後進之士始欲紀前賢之懿範而無可徵矣卽有得之傳聞者多不詳以其所已傳想其所未傳其典型曷可勝旣哉志人物

興縣志

卷之十四 人物

晉

劉殷

北史云劉殷字長盛新興人七歲喪父哀頓三年未嘗見齒九歲魯王毋盛冬思薑食不飽者旬日矣殷哭而求諸野得薑斛餘以歸齊王攸征南將軍祐交辟之以疾辭同郡張宣子勸之殷曰二公晉楹也應其命者譬如榱椽不憑之能有立乎且吾王毋在此身未敢以許人也宣子曰子吾師也以女妻焉王毋卒夫婦毀瘠俱至病而鄰失火殷叩殯號哭火越殯而藝人異

之趙王倫篡以散騎常侍徵逃之雁門齊王固
辟爲軍諮祭酒至固喜曰先王虛心召君不至
今至何也殷曰世祖大聖應期先王至德輔世
故殷敢以匹夫而拒千乘今殿下威罰如流設
復然懼且干華士之誅故不敢不至也固慙謝
永嘉之亂爲劉聰所獲擢侍中錄尚書劉躡至
暴殷柔順諷諭多所全宥以壽終

金

劉昂

昂天資穎悟才識英明踵奕世科名之美詩賦

興縣志

卷之十四 人物

二

自成一家學擅文宗舉進士任河南守判官祀
鄉賢

劉海

海舉狀元任河南府尹祀鄉賢

明

劉弼

弼由孝弟於洪武十三年任太僕寺丞改應天
府通判

郭贊

贊由人材於洪武二十一年任陝西隴州同知

改上元知縣

賀庸

庸由聰明正直保舉於洪武十三年任徐州太僕寺寺丞

王琳

琳貢生一日路如廁得皮襖內銀三百兩呼之無應者卽遍訪有白洪者索失銀於劉永金琳問之皮襖銀數皆符卽付洪後任大興丞歲旱竭家貲以賑民陞太倉知州正德中老歸

勅賜碑曰臣有事君之功妻有從夫之義可錄勸勞

興縣志

卷之十四

人物

三

於碑石表其名於後世

孫光勳

勳家富好行其德時賑貧乏合邑賴活者甚衆歲早上令捐賑勳卽輸粟八百石以賑爲富民倡奉

旨建坊以旌之事載

國史崇祀孝義祠以子兩誥

封焉

孫守訓

訓素封年五十無子父光勳命持八百金賈太原兼娶妾至太原有以一女售訓者詢其家則

現解任都司張某女也訓嘆曰此名門也惡可辱乎人曰張虧官帑七百兩此女奉官售不留必轉售他人矣訓卽惻然願代償其銀傾囊與之不告姓名而去張得釋訓空手歸父怪之訓以實告父喜曰汝存心如此不患無子也後果舉三子

尹就湯

就湯性純篤生平以道義自持衾影無愧待物仁厚嘗捐金以賑乏焚券以賙貧合邑感之以選貢任山東魚臺知縣惠愛在民至今謳頌後

興縣志

卷之十四 人物

四

以子 誥封兵部右侍郎通議大夫壽七十餘卒崇祀鄉賢

尹同臯

同臯就湯子少聰敏絕倫書無所不窺年十八舉於鄉癸丑登進士初授密雲知縣平政釐奸吏民懷之以循卓行取兵科給事中改工科歷刑科陞戶科都給事中又陞太常寺少卿在諫垣章數十上侃侃直言切中時事後巡撫四川加兵部右侍郎疏蹟俱載國史所著有畏天齋實蹟撫蜀須知行於世子衡中戊子鄉試後出

數千金修 文廟及儒學人以為功在斯文云
劉崇輝

崇輝資性純篤學行優長鄉里重之隆慶六年
知縣倪申詳恩賜儒官

孫世蕃

世蕃性慷慨多大略明懷宗末邑大旱斗米千
餘錢鄰邑販粟至者率為土盜所劫官民束手
蕃奮請岢嵐寧武偏關三道事稍延即上鰥陽
和總制發兵平盜販粟踵至一邑獲全至今人
咸頌焉

興縣志

卷之十四

人物

五

國朝

甄于廷

于廷興邑黃家寨村人也兄懷廷及鄉人孫奕
燭與邑豪趙姓者有隙順治乙酉夏邑豪引眾
至于廷兄弟及奕燭與鄉人數百家匿寨中眾
人懇免邑豪曰若第縛甄懷廷孫奕燭來當解
去眾難之二人曰奈何以吾兩人禍合寨請就
縛眾縛奕燭縋而下豪殺之將縛懷廷于廷泣
曰兄尚無子吾有子請代死合寨皆泣賊促之
乃縋于廷下賊曰非也于廷具以實告豪義而

釋之乃解去合寨獲全

張旺

張少保諱旺字月宇興邑陽坡村人幼隨父遷老營堡備耕輟耒嘆曰古之將相多出畎畝吾獨非人也哉於是習弓矢能挽十五石弓矢無虛發諸技勇皆精絕補營伍由外委拔授千總值吳耿逆變隨征救漳州恢復永定縣有功官於粵康熙十五年尙逆變公奮勇劈門血戰出嗣奉調入閩征勦山海屢擒渠魁歷著戰功爲總制姚公啓聖所知拔授遊擊領兵恢復龍虎

興縣志

卷之十四

人物

六

山及長泰等處紀軍功十九年奉檄恢復十九寨併海澄城池及金厦等島公奮勇所至先登兵有節制禁淫擄民皆感悅靖海將軍施烺題陞中軍叅將續授江西南瑞總兵官念其父母未歸窀穸請假歸葬奉

旨孝道所關重大張旺請假葬親情詞懇切殊可軫念着給假四箇月事竣赴任旋調江西南贛總兵

特旨陞江南提督調福建水師提督又調廣西柳州提督所至皆有惠政而在粵尤著柳州皆草屋

火患最烈旺捐俸助民爲瓦屋火患消地多瘡
癘構良方普施之染瘴者皆痊獠獠雜處難化
旺寬嚴互濟輸誠者寬之其梗化者縛而刑之
以徇各洞寨土蠻讐服至今賴之後

誥封光祿大夫於康熙五十一年卒加贈太子少保
欽賜祭葬於康熙五十九年 題請入鄉賢至今崇

祀焉

孫世蓋

世蓋字丹台興邑臨河都人豁達有幹略博通
經史工詩古文辭善射勇力絕倫明末流寇猝

興縣志

卷之十四

人物

七

至邑人皆避匿公升屋射連斃十餘人賊驚退
居民賴以全順治丙戌以明經爲臨縣訓導乙
未陞垣曲教諭境有山寇畫計招降以功擢陞
江西崇仁令崇仁有盜藪曰羅山渠魁羅漢七
擁衆萬餘踞其中勢甚猖前令欲勦之謀泄遇
害蓋至縣中人無慮皆從盜念無可與計者乃
自晦匿佯爲懼怯狀盜易而狎之度其可誘夜
召一老僕告之曰吾與賊不並生汝素忠直肯
從我乎僕曰生死惟命夫人泣曰賊衆公無兵
徒餒虎口耳蓋慨然曰食君之祿忠君之事濟

則君之靈也不濟而死臣之分也吾不能爲全
軀保妻子計明日使人告賊曰功令迫不勦賊
者軍法從事令弱縣無兵勦亦死不勦亦死逃
死故欲降幸將軍於某日至某鎮面計事賊素
易蓋許之及期賊駐衆二千於鎮外漢七與其
軍師吳姓者擁小校三十人來蓋乃設廣席留
小校於外廂每五人一室迎漢七及吳於內廳
念以一人當二人恐不敵時鎮有千總孟姓者
命延之入賊色變劍挺蓋笑曰無疑來勸酒耳
命千總解刀就坐歡極酒闌移後園顧所諭

興縣志

卷之十四 人物

八

僕曰吾與將軍有密語旁人無得入執漢七手
先行僕隨之千總與吳後入園門出不意以手
抱挾漢七眼摔仆地吳拔刀千總自後抱之亦
仆地老僕衣中出數索皆縛之外廂不知也乃
悉召胥吏入授以弓絃數十曰渠魁已擒隨吾
出勸小校酒彼必起爾各立其後吾擲杯於空
彼必仰爾卽以絃扼其喉如是擒二十五人乃
緩其五人使逸曰吾無兵逸之使怖其餘衆可
不戰而散也二千人聞之果夜引去次日乃集
鄉勇入其山則窠穴空矣蓋不煩一兵不發一

矢擒其渠魁於杯酒間而平數十年萬餘嘯聚之衆可謂知勇矣列狀上撫按將交章薦之蓋曰吾止一子不能以垂老之年碌碌他鄉遂冠歸日以詩酒自娛傾囊以濟貧交曰子孫賢無需此不肖此適爲累吾爲去其累也以康熙辛亥卒年六十有五子天繡自有傳

原明田

明田字孟昭少貧力學日夜不輟順治戊子舉於鄉授保定府推官廉直明敏平反甚多以才能行取陞工部營繕司主事又陞員外郎提督河道江淮之人愛戴至今

康貯民

貯民字秀軒一弟殘疾毋卒父繼娶家貧因別居父病謂貯民曰汝多智吾不汝慮汝弟愚且疾難存活用是耿耿貯民流涕曰當竭力撫之設能致產必均分卒乃巡繼毋與弟同爨服賈致巨富爲弟娶生子四撫之皆如已出繼毋悅甚亦忘其非已出也弟卒撫諸侄與同爨濶達喜施地方公事多獨任親友爭財者輒代償以息訟其一歲所出入必令其弟婦知文券皆藏

弟婦所曰吾將與均分不令有疑也年八十病
乃名其弟婦諸侄分產弟婦泣曰尺寸皆伯所
致量給足矣不敢有奢望貯民曰吾與先人約
今日暮見先人於地下一物不均是欺父也悉
均分之而卒闔邑製扁以表其門曰孝友克全

王 珽

珽興邑坊廂都人爲邑庠生父佐係武舉有寃
時珽兄第三人皆孩幼母孫氏明癸未進士奕
煥姑也忍死以撫之稍長日以卧薪嘗膽爲已
任會明季事未得竟已而母疾珽侍醫藥衣絮

興縣志

卷之十四

人物

十

解帶者數年母卒服闋乃遣弟瓚上白其寃蓋
前後四十餘年而寃始雪珽少魁岸有奇氣時
流賊王嘉應至縣珽甫十一歲單騎偵探四十
里外猝遇賊左右射而馳賊不能及歸母以輕
身試賊痛責之公遂折節讀書母性嚴治家整
肅珽等有小過輒督之當髮垂白猶跪受笞責
見者嘆息焉母卒哀毀盡禮遺命無析產故珽
昆第三人白首猶同居年七十二卒長子繩武
娶孫氏丁巳舉人象先女三十餘卒氏殉之將
縊於柩前所親勸之曰死易撫孤難爾氏泣曰

審如是吾爲其難者後子亦卒乃繼其任撫之
至六十一歲卒次子師文娶孫氏崇仁令世蓋
女年四十一卒遺孤四食指衆而家計窘氏守
節撫孤無難色曰不敢墜先人之家聲孀居三
十餘年今尙存人咸謂公之貽謀孝節聚於一
門云

孫承緒

承緒歲貢生充養有道終身不與人爭凡疲癯
殘疾無歸者收養之死給棺木與地而葬之迺
城窰房任民居未嘗取僦值凡佃地者不立約

興縣志

卷之十四

人物

十一

曰償與不償聽自便也與人交易價如數與之
物必取其窳敗者曰此人所棄也吾不取則售
者苦矣人感愧多還其餘值城北紫溝村有請
緒閱地界者至觀之卽於已地退數尺立石曰
以此爲界地鄰愧曰吾何以獨爲小人自取石
置舊界晚年人益服其德不忍與之爭年七十
八卒終身未嘗有愠色凡人無少長皆愛敬之
終身服大布衣行則翼如坐則儼如未嘗見其
有情容鄉里咸矜式焉

孫天繡

天繡字雲章崇仁令丹台公子也少孤天發穎異書過目輒成誦娶原氏工部營繕司員外明田公女能觀書曉大義一日見篋中券纍纍曰此何爲者繡曰先人所以濟貧交也索之非先人意遂焚之閉戶力學於書無所不窺嘗言二氏不知性體俗儒高談性命而無實皆非知道者道在五倫功在日用實致其力以求之而已子正淦爲邑趙姓者所害獄成待決者三年繡抑鬱成疾曰不見彼正法雖死目不瞑乃挾匕首乘隙入獄斷其喉因自繫著復仇或問明聖

興縣志

卷之十四 人物

十三

賢之義與

朝廷之法並行不悖父子天性理所當然非爲任俠也援律請贖事得釋而益力於學手不釋卷雖盛暑未嘗去衣冠族人指數千貧無妻者爲之娶遺孤無人撫者養之有喪者助之族中尊服無敢以事鳴官者凡親友爭訟得繡一言卽解邑歲歉米價騰貴出食米減價糶之適倉中有兵米數百石力請於令以米平糶以價予兵兵無輓運之勞而米價平居民賴之善教子子漁淦嘉淦揚淦皆成進士雍正元年

賈恩累封奉直大夫國子監司業素儉樸衣不帛食
不重味子輩屢勸之曰吾少時父母最鍾愛然
必令衣布曰爲汝惜福吾不及事先人今爲此
者教汝等儉且志先人之德也雍正六年年七
十有五以疾終於京邸蒙

聖恩賜內庫銀一千兩以辦喪事

張聖大

聖大字庸爾少貧作業沿道見聯扁字輒以手
記畫就識者問之不終歲字盡識族兄聖維大
奇之爲延師時年十三矣踰年卽入泮壬申舉

興縣志

卷之十四 人物

十三

明經讀書過目成誦然性沈潛深思每至夜分
獨坐一室冬不爐夏不扇數十年如一日以故
博極羣書成就後學最多性至孝色養備至親
安之而忘其貧父斗昇卒哀甚一夜鬚髮盡白
遇人無少長必恭謹恂恂如不及橫逆之來怡
然樂受終身未嘗有疾言遽色年八十卒

孫振基

振基字乾室隣邑高姓者遇難無依養之十餘
年終始無懈志且寄贍其家有里人婢持金珠
滿篋遺之基得之候於其處卒還婢鄉里製匾

以旌之

王建極

建極少穎悟父母因家貧令廢學營業見其勤敏臨終囑曰汝後必昌善撫諸弟毋令貽我憂父母卒哀毀皆如禮留於陝八載致千金攜其半歸養其兄衣食共之痛兄無子爲撫義子以奉之以其半予弟曰羸以歸汝後弟在陝亦致富以原貲還極極笑曰吾不卽盡予汝者恐汝爲已有而蕩之旣羸矣予不欲毫有所取以違初心初弟亦無子極爲買妾送之陝果生子及

興縣志

卷之十四

人物

十四

第歿撫侄如已出教娶俾成立族叔王烈從弟王御極王興極皆贍其衣食爲之婚娶營葬焉後舉鄉耆合邑咸欽其友愛年七十卒

康若璉

若璉邑庠生性孝友年十五遭父喪哀毀幾滅性二十四值家難一月之內三兄繼歿遺孀白氏賀氏守節家益窘璉以隻身營門戶事寡嫂如母撫諸侄如子同爨者數十年以故嫂得完其志而侄皆成立諸兄遺遺數百金皆拮据償之曰不以累孤寡也疾甚始以產均分諸子侄

其伯兄之子密宮俱瞽乃以已子所分瓦堂村地讓之鄉里咸欽其德義焉

王君寵

君寵字德昭邑庠生性剛直博記多聞慷慨喜施助凡親黨有求輒應隣邑張姓者質於興負本不得歸人曰但求王公則濟從之寵予三十金不責報也邑人劉姓者每來默置一囊於座下寵亦不言收其囊比去實以錢米餽之曰彼羞故不言我言是重其羞也康熙六十年歲歉斗米錢五百流民載道寵憂憫不寐日持錢出

興縣志

卷之十四 人物

十五

路調之男女路處者餽居之減價糶米斗三百日十斛比月餘米價平而寵錢米亦罄矣然獨潔自愛毫不妄取表弟孫嘉淦宦京師迎之寵與書曰君當官如着新衣我可以點塵汚瘴耶卒不去年五十四卒公素厭科舉之學而騁志於經史淵博無涯淡邑子弟有疑質問雖隱與皆具悉始末以告之剛直不能容人之過雖尊貴不避然已有過人責之輒遽改不待其辭之畢也晚年獨坐澄心頓覺表裏瑩然自是務爲冲夷蓋所得深矣

賀聖時

聖時性孝友十餘歲時母呂氏病篤父見龍亦病時左右奉養侍母憂甚及往父所則變爲怡容母卒哀毀父止之輒止然獨居未嘗不涕泣父繼娶先後所出六人時事繼母撫諸弟恩誼備至父病屬子曰予爲諸生數十年不能博一第汝昆季衆家貧當棄書耕矣時泣曰兒在父無憂及卒時爲諸弟延師拮据萬狀諸弟皆多病與俱卧起病第一食亦一食不食亦不食其六弟聖典病甚時延醫診之嘆曰吾閱人多矣未見公之友愛投以地黃湯而愈後四弟聖謨復病藥不效時夜禱於天明旦投以醫前方立愈其精誠所感如此已而其六弟聖典三弟聖訓相繼故時感傷成疾年五十卒卒之次年其五弟聖猷舉於鄉泣曰此吾先兄所日夜望今不及見矣亦以此悲哀成疾焉

劉祖乙

祖乙少孝謹年十五母卒事繼母王氏尤篤撫諸弟飲食教誨備至父卒哀毀盡禮以其饒產讓諸弟鄉里稱之與人交謙和平恕排難解紛必盡力直言無所諱然終身與人無忤也年六十六卒合邑咸悼焉

興縣志

卷之十四

人物

七

明

孝子

郭安

安由監生任陝西經歷操持純篤丁父母憂俱

廬墓三年感白鳩數止其墓有司奏聞建坊旌之崇祀孝義祠

白好古

好古由監生不仕母卒禮葬廬墓三年父卒亦然有司奏聞奉

旨建坊以旌之崇祀孝義祠記載藝文

韓子名

子名天性純篤祖母俱孀居子名竭力孝

養祖母暨母卒俱廬墓朝夕哭奠嘉靖中巡按李爲立孝行坊以旌之

興縣志

卷之十四 人物

十八

康王潔

王潔由監生任山東衛經歷性孝友父卒廬墓晝夜悲泣撫按旌其門

胡王琴

王琴父博先娶閻氏生兄尙默閻氏故繼娶甄氏生王琴甄氏病尙默親侍湯藥未嘗離左右王琴割股調羹以食母母竟卒兄弟俱廬墓父又卒衆勸尙默歸理家事王琴獨居墓所朝夕哭奠面垢髮結竟成疾死於墓所妻劉氏年二十餘以死自誓撫弱孤守節四十年巡撫李立

節孝坊以旌之

王朝冕

朝冕邑庠生母病禱神代死母葬廬墓三年日誦孝經兄朝冠朝夕伴之亦三年知縣王時皞等立匾表其門

馮時亨

時亨邑庠生馮曉之子父早卒母康氏守節課子忽疾甚思鹿肉時亨乃禱城隍祠割左股肉向鄰人劉廷章肉店爲扁食以奉母病果愈

白璽

興縣志

卷之十四

人物

十九

璽珍秀子毋孫氏病重焚香求代毋病果愈知縣李熙才詳撫院賜匾旌之

明

節婦

李氏

李氏者興邑羅峪溝村李君璵之姑適呂姓君璵父巨富而君璵驕縱蕩其產幾盡父將死密出二千金付其姑曰子不肖後當死溝中汝持此去子改行付之不改則與甥毋爲他人所誘蕩也姑泣而受之密藏於近村樹下不令其夫

與子知璵父死數年益落魄姑數賙之後乃佯數之曰若巨富不守分至此乃數數累我寧不愧悔耶璵曰誠悔何及姑曰未也再富仍蹈前轍耳數月璵窘甚復懇姑姑曰設再富當能自守否與洋誓姑見其意誠乃曰隨我來至樹下掘得金璵愕曰此何也姑曰此爾父終時所囑濟爾命者也璵感泣獻其半姑曰此無一人知我欲有之則全有矣奚以半爲丞持去璵歸自刻厲復致富姑死爲成服鄉里咸頌之

白氏

興縣志

卷之十四 人物

二十

氏年十五適劉紹志甫三年而紹志病氏以死誓之及紹志卒家人防護甚謹迨三日氏僞爲舒容默置麻繩於樓上乃假他事登樓卽自縊比家人覺已絕矣時年十七歲知縣王完有傳載藝文

郭氏

氏郭志孝次女適高宗禮禮卒時年二十一越二月生一子舅姑老家貧誓不改嫁晝採薪夜紡績以奉舅姑卒年七十有八五孫皆成立家業寔昌焉

白氏

氏白守舉之女適賀冕年二十二生子永年方一歲而冕亡氏鬻粧奩以育其子年七十有七卒

劉氏

氏劉原長女適關文勝年二十四文勝卒越四月生一子事姑至孝年七十有八卒

陶氏

氏陶智春女適孫仲禮生子九歲而夫歿守節不貳終其身

興縣志

卷之十四 人物

二十一

毛氏

氏毛鳳長女適張志端夫卒越二月生一子撫之謹謚寡言守節終身

王氏

氏王貞次女適康尹尹卒年二十八生二子撫訓備至年遇饑饉志節愈堅

田氏

氏田端女適吳昇生一子夫卒隣婦憐其少勸之嫁氏怒曰命可棄而身不可汗舅姑義之遂其志終身不再醮

張氏

氏張桂林次女適劉某生一子五歲而夫歿氏盡撤華飾訓子成人以終其志

田氏

氏田勝次女適李慶生子恭敬六歲夫亡氏撫之終身不嫁

康氏

氏甄泰妻泰病劇呼其妻曰親老子幼柰何遂卒氏奉親撫子守節終身以成夫志

齊氏

興縣志

卷之十四 人物

三

氏王璵妻子四歲璵卒氏年二十八自縊於屍傍嘉靖三十二年巡撫李立貞婦坊以旌之

劉氏

氏生員樊瓚妻生子安仁方襁褓瓚卒氏年二十四終身不改節訓子任秦州判官嘉靖八年奏聞旌表三十二年又蒙巡按李立貞婦坊以旌之

李氏

氏張子建妻子建卒方娠號泣咽血後子亦卒撫二孫嘉靖三十二年巡按李立貞婦坊以旌

之

趙氏

氏白能妻生子方禮祿能卒食貧守志誓不改節

樊氏

氏張王寶妻寶卒年二十六事親撫孤長子鶴入太學次子鵬中壬子鄉試嘉靖三十二年巡按李立貞婦坊以旌之

孫氏

氏胡天祿妻夫卒氏年二十三無子撫義子守

興縣志

卷之十四 人物

三二

節年七十卒

樊氏

氏劉玫妻夫卒氏年二十一兄欲奪其志氏攜子訟官貧苦守志年七十九終

賀氏

氏王鸞妻夫卒氏年十九隨夫自縊隆慶六年巡按桂立貞烈坊以旌之

陳氏

氏吳良能妻夫卒氏年二十三隨夫死節隆慶六年巡按桂立貞烈坊以旌之

李氏

氏田紹先妻夫亡氏年二十四同姑守節孝養終身年七十六卒

王氏

氏王天良女適張王佩嘉靖二十七年王佩死氏誓死不嫁勤儉理家孝養翁姑撫幼子張敏入國學官列兩省年六十二卒

白氏

氏生員白朝漢女適張昇方娠夫亡生子親爲耕耘以撫之年六十有三卒

興縣志

卷之十四 人物

二十四

國朝

孫氏

氏舉人孫守謨女適劉文衡氏年二十八歲文衡卒遺子長者甫九歲少者方在襁褓時值荒歉拮据撫孤或勸改節氏大怒曰爲此事者決非人類爲此語者豈復有人心乎遂以死自誓親姻不敢輒入中門訓諸子皆成立康熙十二年卒年七十三歲

劉氏

氏劉德化之女適庠生原見田年二十九生二

子溶澤而見田卒子幼家貧柏舟自誓言行皆可爲壺範年八十餘闔邑製錦以旌之卒年八十二子二孫三曾孫八皆訓撫成立人稱氏爲節婦之首焉

杜氏

氏鄉耆杜賓女也及笄適廩生白居易生子鱣甫七歲而居乙故氏年二十六墜志撫孤臆簪珥購書延師以教之嘗謂鱣曰家門不幸所恃惟汝宜早成立鱣感泣旋入泮生五子家道雍睦邑人公舉署令耿克仁表其門曰節凜冰霜咸頌以爲杜氏之遺範云

孫氏

氏生員孫幼敏女適生員劉銜氏年二十四舅與夫相繼歿氏奉姑撫一子祖虞已而姑與祖虞亦相繼歿祖虞無出劉氏之門閨其無人氏孑然一身苦志守節凡六十年壽八十四卒

劉氏

氏生員劉我壘女適生員喬國英氏年二十二

英卒子鴻祚甫三歲氏恐喬祀絕堅志撫孤後
鴻祚入泮生孫大觀舉明經皆成立年八十四
卒守節凡六十二年

氏

氏曹啞子母早寡子廢疾食貧孀居鄰婦王氏
亦寡氏約與俱守節積十五年一日氏偶適外
親或奔告曰王氏改嫁矣氏驚曰信有之乎曰
目所親見也氏乃撫掌大慟曰不意醜婦竟作
此事遂氣憤而絕至今鄉里傳其事

孫氏

興縣志

卷之十四 人物

二十六

氏鎮原知縣象觀次女適尹克忠生子郊甫二
歲夫卒氏年二十三苦節撫郊訓養備至子以
成立康熙四十五年卒年六十三守節凡四十
年鄉里製錦以旌之署縣事商基鏞爲之匾曰
畫荻遺風

王氏

氏王應名之女適白迎祥迎祥多力善騎射康
熙十二年隨陝鎮征茅籠山戰死氏年二十八
子富華方七歲貴華五歲家貧如洗氏力作以
贍之事姑奉養備至撫二子皆成立縣令金藻

燕旌其門曰幽貞可範年七十一卒

由氏

氏康文彪之妻年二十一文彪卒遺子齡松幼家甚窘以女工自給撫子成立又任由成甫五歲母故父病氏撫成十餘歲令歸承其家外孫孫康國甫三歲父母俱亡氏撫之至十五歲歸承孫氏祧氏一人而三姓之孤賴焉年七十一卒鄉里製冰霜罄節匾以旌之

白氏

氏邑人白天顯之女年十四適孫雲鞠鞠甚貧

興縣志

卷之十四 人物

七

氏井臼外復營雜業以贍之家漸豐生子九歲而鞠亡時氏年二十七益苦志晝夜操作無暇刻對姑嫜無笑容問之曰吾以待亡也延師教其子時戒之曰汝成立吾守不成吾從汝父於地下康熙丁酉冬爲子娶曰吾事畢矣戊戌清明節攜子與新婦至鞠墓拜奠指其子謂妻曰此君子也吾撫之二十餘矣指其婦曰此君媳也吾爲娶之事已畢吾將從君一號什墓而絕時年四十七鄉里咸異之爲製匾復公舉於學申詳學使者粘以年未合例不便題請而賜

額以旌曰節烈可風

康氏

氏康其身女幼適王授基氏年十九歲授基歿於外遺腹子立氏撫之十餘歲爲延師聘婚事皆定廼畢會親姻率立哭奠於授基墓次早閉戶自經死時年三十二鄉黨贈匾以旌之曰大節凜然

白氏

氏邑人白重碧之女適康如珍年三十歲如珍病故無子撫侄家爲嗣守貞教子家成立爲庠

興縣志

卷之十四

人物

二十八

生於雍正五年卒年七十一歲凡守節四十二年

王氏

氏王于豐女適孫士熊年二十九歲士熊病故遺一子殿翔方二歲或以氏年少欲奪其志氏慟曰與其捨子而去何若從夫而死遂毀容苦志撫子殿翔成立入國學勤儉苦節三十年如一日壽六十終

奧氏

氏奧鴻儒女適白應昌氏年二十九昌卒遺一

子天照家貧拮据苦志守節撫子成立年六十四卒守節凡三十五年

崔氏

氏生員劉鉉之妻崔鼎慶之女也生一子定邦甫三歲而鉉卒氏年二十三家貧甚苦志撫孤與親姻幾絕往來者數十年今年八十有一鄉里製錦以旌之

郭氏

氏郭居廣之女適孟開統年二十四開統故遺子恭方四月赤貧守志誓不改節今年七十七

興縣志

卷之十四

人物

二十九

歲守節已五十四年

孫氏

氏生員孫廷蕙長女幼適樊述聖生二子述聖卒年二十八舅以家貧欲嫁之氏泣訴於父與弟以死自誓父語舅舅泣拜氏曰能如是吾死瞑目矣氏苦節食貧今年七十六人咸欽其苦節云

賀氏

氏邑人賀天祐之女適康如珍之弟如琰年三十一歲如琰卒無子矢志與如珍妻白氏共守

節撫侄室爲嗣尙未週歲育養教誨入邑庠食廩餼凡守節五十年今年八十尙存其叔如璋事寡嫂撫諸侄恩誼備至一庭雍睦邑人稱之

劉氏

氏朔州生員劉時化之女適邑庠生原濤年二十八濤卒無子乃撫堂侄肇曦爲嗣苦志持門戶今年六十有五守節已三十七年

孫氏

氏生員孫統之女適白鯨克盡婦道舅姑病扶侍數年無懈志生諸子皆幼而鯨卒氏年二十

興縣志

卷之十四 人物

三十

八守節撫諸子皆成立家益豐今年六十有八鄉里製錦以旌之

康氏

氏康俊傑長女適喬之珩年二十一夫卒踰三
一子亦卒氏苦節事翁姑至孝後翁癱姑失明
氏衣不解帶者各數年溲便皆手自除之翁姑
歿氏安貧自守今年五十歲

尹氏

氏尹丕忠次女年十四適王興盛以孝聞姑病
勤苦奉養者七年姑卒哀毀備至年二十五與

盛亦卒子嘉正五歲嘉俊方襁褓姑嫜以其青年子幼勸改醮氏厲色曰無子尙欲以死殉夫於地下況有二子柰何出此語乃閉門絕往來子偶過必嚴責之或不食子能改方已以故子皆成立家益昌鄉黨欲旌之氏曰婦人守節自本分事何足旌也今年五十有五蓋守節已三十年矣

康氏

氏已酉舉人康體元女也少聘生員劉玘之子士麒將于歸而士麒癩久之病益甚玘與體元

興縣志

卷之十四 人物

三十一

議退婚氏聞之曰彼雖癩吾夫也以死誓之體元喜曰能如是吾成汝志年十九歸士麒而士麒不通人事數年矣氏以處女依其姑如母事士麒衣食備謹雖詈毆不少懈舅姑憐之氏曰命如此不怨也舅沒事姑彌篤姑八十餘卒氏哀毀如禮親爲營葬姑沒二十年士麒始卒前後四十年事士麒如一日會士麒弟士麟先姑卒亦無子氏孤苦無依而志益堅乃撫從侄承曾爲子持門戶以終其志鄉黨共憐之前署會商基鏞暨闔邑紳士皆製匾以旌其賢

王氏

氏王文德之女里民劉光榮之妻也歷事三姑
備盡孝道其四弟光世生五日而母卒家貧不
能僱乳氏並未育乃於姑柩前哭告自撫之吮
半月而乳足弟善病七歲不釋懷稍長卽以女
工佐學費居家勤儉娣姒雍睦人咸稱異焉

興縣志

卷之十四 人物

三十一

